

Comite nacional di coordinacion Autismo lo keda institui



ORANJESTAD -- Re-cientemente Fundacion Autismo Aruba hunto cu Autism Speaks USA a reuni representantenan di ministerio di Asuntonan Social, Educacion y Salubridad.

Intencion ta pa institui un comite nacional di coordinacion pa asina haya mas informacion, conscientisacion y guia den nos comunidad pa loke ta trata e condicion celebral aki. Presente for di Merca ta sr. Michael Rosanoff, di Autism Speaks USA kende a reuni minister Paul Croes y Michelle Hooyboer-Winklaar.

Autism Speaks USA
Micheal Rosanoff ta director asocia y tambe ta haci investigacion ariba autismo na Merca. Rosanoff ta dispuesto pa yuda Aruba bira un lider den Caribe pa locual ta informacion, conscientisacion y apoyo na esunnan Autista. E apoyo pa educadornan, mayornan y famianan ta crucial pa desaroyo sano di un persona autista. E ta hopi contento di por ta na Aruba y di por aporta na e plan nacional aki.

Situacion Aruba
Segun minister Paul Croes, e intencion ta pa yega na cierto protocolnan di cooperacion entre departamentonan pa

asina haya sa mas di e condicion celebral aki. Ta pa promebes cu e coordinacion pa institui e comite nacional lo sosode den e forma aki y nan mester haya un bista primeramente di e cantidad di personanan autista na Aruba pa despues crea conocimiento con pa reconoce e condicion for di un edad hoben y pa finalmente compronde cua ta e miho forma con pa guia muchanan autista den nos sociedad. Calculonan ta muestra e porcentahe 2.5% di autismo na Aruba, esaki basa riba cifranan internacional. Awor mester traha pa hisa e nivel di habilidad di nos hendenan autista, diagnostica nan tem-

pran y duna e yudansa cu tin mester pa asina nan por yega nan potencial maximo y bira personanan mas productivo den nos comunidad.

Fundacion Autismo Aruba

Sra. Thais Erasmus y sra. Dilma Arends di Fundacion Autismo Aruba tin hopi aña dedica na e Fundacion y ta hopi contento cu e desaroyonan aki. E comision nacional lo mester bay identifica kico nan kier pa asina traha un plan strategico cu lo wordo yuda pa Autism Speaks USA y asina yuda Fundacion Autismo Aruba yega na e meta cu nan kier logra. □

